

QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM

die Iouis 26. Martij.

M. CLAVDIO LE VASSEVR,

DOCTORE MEDICO, PRÆSIDE.

An annus qui fructuum, idem & morborum ferax?

I.

CVM hujus mundi ornatus & pulchritudo in constanti ejus partium varietate fluxuque perpetuo consistant, necesse fuit prima rerum omnium caducarum elementa continenter moueri, vt dum aliæ ex iis coagmentatæ dissoluantur, recentes aliæ, nouæque formæ conuestitæ in scenam prodeant. Quò verò id facilius fieret, istis, è quibus omnia nascuntur, initiis, contrarias vires inuenit Naturæ author, vt quanquam societatem coeant, nullâ stabili pace vtantur; nec modò occultas insidias sibi inuicem struant; sed etiam inter se apertas ac immortales exercean inimicitias. Verùm quia periculum erat ne in eâ primordiorum pugnâ, ex iis aliquod cæteris superius euassisset, ad fœdus & pactionem ampliùs adduci non posset, percommode cadit, vt quæ in ipsâ conflictione fracta dejectaque videbantur, singula cognatæ sibi tempestatis reuersione resurgant, vicissimque vires colligant; atque adeò quadripartitæ temporum commutationes, cum aptæ congruentesque fuerint, & ad eisdem satus ortus incrementa, & ad maturandos metendosque fructus, & ad corporum tempe-

rationem, integramque animantium sanitatem omninò comparata sint.

I I.

ANNVS est illud temporis spatium quo Sol ab vno Zodiaci puncto ad idem reuertitur; is fructuum feracissimus est, cum numerosissima quæ edidit germina ad maturitatem perducuntur, aptè variato ac modificato aëre, quod vtrumque dum pulchrè it, efficit. Plantarum autem propè eadem ac animalium ratio. Vt enim in his, si bellè nutriantur, proficiscitur aliquid è totà circumfluentis sanguinis mole, singulisque corporis particulis, quod in semen abit, habetque tacitas ac velut in angustum coactas, animantis in quo est, similis ex eo progignendi, vires: sic vbi ad illarum partum conueniens & elaboratus succus quoquouersum exportatur, fructuum seminumque initia, in ipsis fibrillis solidisque particulis inchoata decerpit, secumque transeundo aufert. Ex quo ad ipsum delato oculum, tanquam sanguine ad testes, secernitur germen plantarum, non secus ac serum in renibus. Ac illis dum lætæ sunt & vigent, perinde atque animantibus quandiu valent, semen satis copiosum suppetit; sed quod iners foret, nisi calor cælestis vim illius insitam promoueret, primaque fructuum rudimenta poneret, foueret, excitaret. Sub quod ferè tempus erumpit flos, vt plantarum, sic coloni gaudium jucundaque spes, cuius foliis nutritionis inopiâ decidentibus, quidquid ex succo ad plantam alendam idoneo superest, facessit in incrementum fructus inclusique seminis, quæ quàm varias subeant mutationes, declarant variis temporibus, & serie quâdam sibi succedentes diuersi sapores, acerbus, austerus, acidus, dulcis.

I I I.

MOTIONVM omnium continuatæque mundi naturæ causa est annus, qui si benè temperatus, fertilissimus est ac saluberrimus; scilicet hyemis frigore coercitus, ac velut ad intimos plantarum lares compulsus calor innatus, absque animæ operâ, ducit prima fructuum seminumque lineamenta & stamina: quæ vt veris tepor lenisque affluit aura, se se proferunt foliorum ac florum eruptione. Fructus tunc temporis si quos degustes, peracerbos austerosque deprehen-

des, ob adjunctam terrenæ siccitati frigiditatem non medio-
crem, quam emendare quidem, at vincere nunquam valeat
vernus calor, nisi æstatis accessione valentior factus, tenuatâ
eorum substantiâ, ex austeris acidus redderet, subindeque in
dies inualescens, illos sensum citra vredinem ita excoqueret,
vt mitigati jucundèque conditi, sui tandem saporis dulcedine,
ob quam vnâ ab animantibus experuntur, gustum blandè
moueant. Sed ne mox ab ea discedant, æstatis feruor au-
tumni frigore remittitur, quo quemadmodum & vernaculâ
tempestatis istius siccitate, vt fructus ipsi, mox alioqui corrup-
pendi, in hyemem reponi possint, & ad multos menses inte-
gri durent, efficitur.

I V.

ANIMALIS cuiuscunque sanitas optimâ partium si-
miliarium temperie, organicarum conformatione, om-
niumque decenti positione ac nexu continetur: At non satis
est eximiam illam corporis constitutionem nascendo nactum
sit, nisi iustis viuendi legibus, qualem à naturâ accepit incor-
ruptam tueatur: Vt eo certius naturalem vitæ cursum comple-
turum sit, quo minùs rerum externarum injuriis lacefferetur. Ne-
que tamen fieri potest quin ætatum omnium decursu varias
multiplicesque subeat mutationes, quibus si immoderatè con-
cutiatur, de optimo valetudinis statu in deteriorem qui mor-
bus est prolaberetur. Porro inter ea quibus corporis grauiùs per-
cellendi vis inest, principatum tenet aër qui & spiritu ducitur,
& nobis perpetuò circumfunditur: quippe qui promptè om-
nia penetret, eâque vel substantiâ vel qualitate quâ prædi-
tus est, spiritus, humores, & partes omnes imbuat. Ideo-
que cuiusmodi sit, purusne ac tenuis, an crassus & concre-
tus permagni ad vitam interest. Planè vt caliginosus & alienâ
permixtione inquinatus nihil non polluit, suaque statim vitia
quoquoersum diffundit: sic cæli tenuitate & calore tempera-
tus, sanguinem & corpus vniuersum collustrat, vitalemque ac
salubrem spiritum præbet animantibus. Nec desunt qui non
solum verisimile, sed etiam verum esse censent, perinde vt ille
se habet, ita pueros orientes animari, formari; ex eoque in-
genia, mores, animum, corpus, vitæ actiones exitumque
finigi.

AER multis modis multisque de causis, maximè tamen Solis motu, siderumque exortu ac obitu insigniter mutatur, mutatque omnia: annum quippe facit, manifestâ quam affert primarum qualitatuum varietate, in quatuor tempora distributum, quibus humanæ vitæ cursum imitatur. Sunt enim ver pueritiæ, æstas florenti ætati, autumnus declinanti, hyems senectuti similia; vt illorum eadem sit quæ harum temperies Solis quidem accedentis ac recedentis motu constans similisque semper futura, nisi siderum haud ignobilium ortus & occasus, disparesque terrarum & hujusce mundi aspirationes ejus diuersitatem cum secundæ tum aduersæ valetudinis effectricem inducerent. Inde illa quæ terris incubuit cohors morborum etiam aliâ atque aliâ formâ renascentium, annoque malè morato fraudem vel Medicis facientium. Quanquam hæc ferè laus est omnium anni partium, vt quos vna peperit morbos, hos vel subsequens deleat vel aduersa: nulli verò aut certè rari admodum, ijque mitissimi ingruant, cum singulæ quam sibi vendicant temperiem constanter retinent, nec repente inuadunt, sed in alteram altera paulatim soluitur, gratæque vice desinit. Ita enim quatuor humores suo ordine ac tempore renouantur, castigatique florent, vt vel ipse autumnus distillationibus crebrisque tabidorum funeribus infamis vix vllos creet morbos, aspersamque sibi maleficij maculam, suâ simulque fructuum amœnitate ac copiâ eluat.

Non ergo annus qui fructuum, idem & morborum serax.

Proponebat Lutetiæ L V D O V I C V S M O R I N,
Cenomanus, A. R. S. H. M. DC. LXV.